

## I. DISPOSICIÓN XERAIS

### XEFATURA DO ESTADO

- 18132** *Real decreto lei 18/2011, do 18 de novembro, polo que se regulan as bonificacións de cotas á Seguridade Social dos contratos de traballo subscritos con persoas con discapacidade pola Organización Nacional de Cegos Españois (ONCE) e se establecen medidas de seguridade social para as persoas traballadoras afectadas pola crise da bacteria «E.coli».*

A Organización Nacional de Cegos Españois (ONCE) é unha corporación de dereito público de carácter social, con personalidade xurídica propia e plena capacidade de obrar e de autoorganización, cuxos fins sociais se dirixen á consecución da autonomía persoal e plena integración das persoas cegas e con deficiencia visual grave, mediante a prestación de servizos sociais, que exerce en todo o territorio español funcións delegadas das administracións públicas, baixo o protectorado do Estado, e cuxa organización se regula a través do Real decreto 358/1991, do 15 de marzo, polo que se reordena a Organización Nacional de Cegos Españois.

A actividade social, económica e empresarial da dita corporación está informada polos principios e valores da solidariedade, a ausencia de ánimo de lucro e o interese xeral, e institúese como operador singular relevante na formación e creación de emprego para persoas con discapacidade, como axente social de cohesión e vertebración dos movementos sociais, e como elemento diferenciador que reforza o modelo español de protección social da discapacidade, tanto ante a Unión Europea como ante outras instancias internacionais.

De conformidade co establecido no número 21 do Acordo xeral entre o Goberno da Nación e a Organización Nacional de Cegos Españois en materia de cooperación, solidariedade e competitividade para a estabilidade de futuro da ONCE para o período 2012-2021, e tendo en conta que a ONCE é a maior empregadora de persoas con discapacidade que existe en España, devén unha exigencia absolutamente necesaria e perentoria dotar a dita corporación de mecanismos que permitan a continuidade das súas actividades, concretados a través do establecemento dunha bonificación dun 100 % das cotas empresariais da Seguridade Social, incluídas as de accidentes de traballo e enfermidades profesionais, e nas achegas empresariais das cotas de recadación conxunta, de forma similar ao que sucede nos centros especiais de emprego.

En función do establecido na disposición adicional cuadraxésima da Lei 39/2010, do 22 de decembro, de orzamentos xerais do Estado para o ano 2011, e do anterior convenio coa ONCE, faise urxente e necesario establecer un sistema alternativo da xeración dos instrumentos e mecanismos para que a ONCE siga contando con suficientes recursos en 1 de xaneiro de 2012, e cumpra cos fins sociais e de solidariedade que lle están encomendados, asegurando así a estabilidade xurídico-institucional, como axente social de vangarda, así como a estabilidade financeira da dita institución a longo prazo, potenciando en definitiva o acceso das persoas con discapacidade ao mercado laboral.

Por outra parte, a crise da bacteria «E.coli» e a intoxicación alimentaria en Alemaña motivou unha serie de axudas institucionais ás empresas do sector agrícola español afectadas polos primeiros informes que apuntaban aos produtos do campo español como posible causa da enfermidade. Esta causa foi descartada posteriormente, pero o dano ás persoas produtoras e traballadoras xa prexudicara sensiblemente o sector agrícola.

As axudas aprobadas pola Comisión Europea tiveron como destinatarias as empresas; porén, as persoas traballadoras non foron protexidas pola dita continxencia. En consecuencia, neste real decreto lei apróbanse medidas coa finalidade de compensar esas persoas traballadoras pola diminución da cotización á Seguridade Social, producida como consecuencia da non realización das xornadas de traballo agrícolas, mediante a

subscrición dun convenio especial coa Tesouraría Xeral da Seguridade Social, que se financiará con cargo aos orzamentos do Servizo Público de Emprego Estatal.

Na súa virtude, sendo urxente a adopción das medidas anteriormente expostas e facendo uso da autorización contida no artigo 86 da Constitución, por proposta da vicepresidenta do Goberno de Asuntos Económicos e ministra de Economía e Facenda, da ministra de Sanidade, Política Social e Igualdade e do ministro de Traballo e Inmigración, e logo de deliberación do Consello de Ministros na súa reunión do día 18 de novembro de 2011,

DISPOÑO:

*Artigo 1. Bonificación de cotas á Seguridade Social.*

1. Darán dereito a unha bonificación do 100 % nas cotas empresariais da Seguridade Social, incluídas as de accidentes de traballo e enfermidades profesionais, e nas achegas empresariais das cotas de recadación conxunta, os contratos de traballo celebrados ou que celebre a Organización Nacional de Cegos Españois (ONCE) con persoas con discapacidade, en calquera das modalidades de contratación previstas na lexislación laboral e durante toda a vixencia dos ditos contratos. Desfrutarase a mesma bonificación no suposto de transformación en indefinidos dos contratos temporais de fomento de emprego de persoas con discapacidade ou de transformación en indefinidos dos contratos de duración determinada ou temporais, incluídos os formativos subscritos con traballadores con discapacidade.

2. Para os efectos deste real decreto lei, enténdese por persoas con discapacidade as incluídas no artigo 1.2, terceiro parágrafo, da Lei 51/2003, do 2 de decembro, de igualdade de oportunidades, non discriminación e accesibilidade universal das persoas con discapacidade.

3. As ditas bonificacións poderanse obter sempre que a Organización Nacional de Cegos Españois (ONCE) se encontre ao día no pagamento das cotas á Seguridade Social.

4. No non previsto nesta disposición será de aplicación o establecido na sección 1.<sup>a</sup> do capítulo I da Lei 43/2006, do 29 de decembro, para a mellora do crecemento e do emprego.

*Artigo 2. Medidas de seguridade social para as persoas traballadoras afectadas pola crise da bacteria «E.coli».*

1. As persoas traballadoras que, como consecuencia da crise no sector agroalimentario provocada pola bacteria «E.coli», visen diminuída a súa actividade laboral nas empresas afectadas poderán subscribir un convenio especial coa Tesouraría Xeral da Seguridade Social polos días deixados de traballar nas ditas empresas.

2. Para os efectos desta norma considérase que unha persoa traballadora viu diminuída a súa actividade laboral como consecuencia da crise no sector agroalimentario provocada pola bacteria «E.coli» cando se cumpran os requisitos seguintes:

a) Ter tido unha relación laboral no ano inmediatamente anterior cunha empresa do sector agroalimentario de entre as afectadas nos seus procesos produtivos pola crise da bacteria «E.coli».

b) Acreditar a situación de inactividade nunha empresa afectada durante o período de maio a xullo no exercicio 2011.

3. A subscrición do Convenio especial coa Tesouraría Xeral da Seguridade Social realizarase conforme o disposto na Orde TAS/2865/2003, do 13 de outubro, pola que se regula o convenio especial no Sistema da Seguridade Social, coas seguintes especialidades:

a) As persoas traballadoras poderán subscribir o convenio especial nas condicións previstas nesta norma cando cesen ou causen baixa na actividade que viñan

desenvolvendo no período comprendido entre a entrada en vigor desta norma e o 31 de decembro de 2013.

b) As persoas traballadoras poderán subscribir igualmente o convenio especial con carácter retroactivo para cubrir o período de inactividade no período de maio a xullo de 2011, cando non se producise cotización nin por actividade nin por prestación de desemprego.

c) No suposto do parágrafo anterior, a solicitude deberase producir no espazo de 90 días computados a partir da entrada en vigor desta norma.

d) Na solicitude de subscripción deberase facer constar a condición de persoa afectada pola crise do sector agroalimentario provocada pola bacteria «E.coli», así como xuntar un certificado da empresa mencionada no punto segundo en que conste o número de días que tería prestado servizos nela, de non se ter producido a citada crise no sector agroalimentario.

e) A elección da base de cotización será a do último mes traballado na empresa que asina o correspondente certificado, debidamente actualizada.

f) O aboamento do importe da cota que corresponda polo dito convenio especial será efectuado polo Servizo Público de Emprego Estatal directamente á Tesouraría Xeral da Seguridade Social.

4. O financiamento da medida regulada neste artigo realizarase con cargo ao orzamento do Servizo Público de Emprego Estatal, sen que o crédito que a financie teña a consideración de fondo de emprego de ámbito nacional, a que se refire o artigo 14 da Lei 56/2003, do 16 de decembro, de emprego, polo que non será de aplicación o establecido no artigo 86.2 da Lei 47/2003, do 26 de novembro, xeral orzamentaria.

5. A Tesouraría Xeral da Seguridade Social remitirá no primeiro semestre de cada exercicio e ata o ano 2014 a información relativa ás persoas traballadoras afectadas pola crise no sector agroalimentario provocada pola bacteria «E.coli» que subscribiron o convenio especial de acordo co establecido nesta norma, no exercicio inmediatamente anterior; as empresas que certificaron os días do período de maio a xullo de 2011, en que estas persoas traballadoras terían prestado servizos de non se ter producido a citada crise e o importe dos convenios especiais subscritos por estes.

6. O Servizo Público de Emprego Estatal, recibida esta información e logo da súa análise, procederá a realizar o aboamento correspondente á información recibida no segundo semestre de cada exercicio, sendo 2014 o último ano en que se producirá un aboamento por esta causa.

7. As persoas traballadoras por conta allea do réxime especial agrario da Seguridade Social, que cumpran os requisitos establecidos no número 2 deste artigo, poderán solicitar o reembolso das cotas satisfeitas polos períodos de inactividade acreditados durante os meses de maio a xullo de 2011.

A solicitude efectuarase ante a Tesouraría Xeral da Seguridade Social, que procederá á devolución das cotas e á reclamación dos importes resultantes ao Servizo Público de Emprego Estatal.

Así mesmo, cando as persoas traballadoras, que cumpran os requisitos establecidos no número 2 deste artigo, causasen baixa no censo agrario durante os meses de maio a xullo de 2011, poderán solicitar á Tesouraría Xeral da Seguridade Social a alta no censo durante os períodos de inactividade acreditados neses meses. As cotas correspondentes serán satisfeitas polo Servizo Público de Emprego Estatal á Tesouraría Xeral da Seguridade Social.

8. O Servizo Público de Emprego Estatal poderá autorizar, para as persoas traballadoras que cumpran os requisitos establecidos no número 2 deste artigo e accedesen á prestación por desemprego de nivel contributivo regulada no texto refundido da Lei xeral da seguridade social, aprobado polo Real decreto legislativo 1/1994, do 20 de xuño, que o tempo en que se percibiu a dita prestación polos períodos de inactividade acreditados durante os meses de maio a xullo de 2011 non se compute para os efectos de consumir a duración da prestación recoñecida.

9. As persoas traballadoras agrarias por conta allea de carácter eventual que cumpran os requisitos establecidos no número 2 deste artigo, cando non puidesen acceder, por careceren das xornadas mínimas, ao subsidio por desemprego que regula o

Real decreto 5/1997, do 10 de xaneiro, polo que se regula o subsidio por desemprego a favor dos traballadores eventuais incluídos no réxime especial agrario da Seguridade Social, ou á renda agraria regulada polo Real decreto 426/2003, do 11 de abril, polo que se regula a renda agraria para os traballadores eventuais incluídos no réxime especial agrario da Seguridade Social residentes nas comunidades autónomas de Andalucía e Extremadura, poderán ser beneficiarios sempre que teñan cuberto no dito réxime especial un mínimo de 20 xornadas reais cotizadas nos doce meses naturais inmediatamente anteriores á situación de desemprego, sempre que reúnan o resto dos requisitos exixidos na normativa aplicable, e que o período de inactividade acreditado se encontre dentro dos doce meses naturais inmediatamente anteriores á situación de desemprego.

Cando se aplique o previsto no punto anterior, considerarase acreditado un número de 35 xornadas reais cotizadas para os efectos do establecido no artigo 5.1.a) do Real decreto 5/1997, do 10 de xaneiro, e nos artigos 4.1 e 5.1.a) do Real decreto 426/2003, do 11 de abril.

Na solicitude de prestacións recollida nos números 8 e 9 deberase facer constar a condición de persoa afectada pola crise do sector agroalimentario provocada pola bacteria «E.coli», así como presentar un certificado da empresa en que conste o número de días que tería prestado os seus servizos nela, de non se ter producido a citada crise no sector agroalimentario.

Disposición adicional única. *Financiamento.*

1. As bonificacións previstas neste real decreto lei financiaranse con cargo ao orzamento do Servizo Público de Emprego Estatal, programa 241.A, concepto orzamentario 487.03.

2. As medidas de seguridade social aplicables ás persoas traballadoras afectadas pola crise da bacteria «E.coli» financiaranse con cargo aos orzamentos do Servizo Público de Emprego Estatal, para o cal se consignará crédito adecuado no orzamento de gastos deste organismo nos exercicios 2012, 2013 e 2014. En todo caso, o financiamento desta medida realizarase con prioridade sobre as restantes medidas ou accións que este organismo deba realizar.

Disposición derradeira primeira. *Modificación da Lei 47/2003, do 26 de novembro, xeral orzamentaria.*

Dáse nova redacción ao primeiro parágrafo da disposición adicional décimo oitava da Lei 47/2003, do 26 de novembro, xeral orzamentaria, nos seguintes termos:

«No caso de que a ONCE non alcanzase, no exercicio inmediato anterior ao considerado, para o conxunto dos xogos comercializados que para o efecto se autoricen, os obxectivos de venda aprobados polo Goberno, a entidade pública empresarial Lotarías e Apostas do Estado realizará, durante os exercicios 2005 a 2011, unha asignación financeira que anualmente fixará o Goberno de acordo coas normas contidas nos seguintes puntos:»

Disposición derradeira segunda. *Entrada en vigor.*

Este real decreto lei entrará en vigor o mesmo día da súa publicación no «Boletín Oficial del Estado», ben que o seu artigo 1 terá efectos económicos a partir do 1 de xaneiro de 2012.

Dado en Madrid o 18 de novembro de 2011.

JUAN CARLOS R.

O presidente do Goberno,  
JOSÉ LUIS RODRÍGUEZ ZAPATERO